



## SIARAN MEDIA

### **PELAN TINDAKAN DASAR SOSIAL NEGARA (PTDSN) 2026 – 2030: MEMPERKASA TINDAKAN MENANGANI ISU SOSIAL SECARA MENYELURUH**

**KUALA LUMPUR, 7 MEI 2026** – YAB Dato' Seri Dr. Ahmad Zahid Hamidi, Timbalan Perdana Menteri Malaysia hari ini melancarkan Pelan Tindakan Dasar Sosial Negara (PTDSN) 2026 – 2030 yang merupakan denyut nadi yang menggerakkan daya dan arah pembangunan sosial negara. Pelan ini dibangunkan melalui kerjasama erat antara 32 agensi termasuk kementerian, kerajaan negeri, pihak swasta, dan komuniti.

Pelan ini dibangunkan bagi menyokong Dasar Sosial Negara (DSN 2020) dan menterjemah iltizam negara untuk memperkukuh ekosistem sosial yang lebih menyeluruh dan mampan, berasaskan nilai kemanusiaan serta kesejahteraan bagi semua masyarakat Malaysia.

Pelan Tindakan DSN 2026–2030 dirangka berasaskan empat teras utama dalam DSN, merangkumi 17 bidang keutamaan, 18 strategi dan 102 inisiatif. Pendekatan *Whole of Government* dan *Whole of Nation* diterapkan bagi memastikan setiap intervensi dilaksanakan secara responsif, strategik dan mampan. Berteraskan prinsip keterangkuman, pelan ini memperkukuh kerjasama merentas sektor bagi menjamin tiada rakyat yang tercicir daripada arus pembangunan negara.

Pelan ini dirangka bagi memastikan hasil yang nyata dan boleh diukur bagi pelaksanaan DSN yang telah dirasmikan pada tahun 2024. Dalam hal ini, KPI berperanan sebagai panduan utama yang memastikan setiap inisiatif dilaksanakan secara terarah, selaras dengan objektif ditetapkan serta dapat dinilai secara objektif. Penetapan KPI yang jelas turut memperkukuh akauntabiliti agensi, meningkatkan kecekapan tadbir urus, dan memastikan setiap inisiatif memberi impak sebenar kepada rakyat, sejajar dengan pencapaian *outcome* nasional Malaysia MADANI.

Seiring dengan usaha mencapai status negara maju, pembangunan fizikal dan ekonomi perlu disokong oleh pembentukan generasi berfikiran matang, berdisiplin dan berdaya tahan. Justeru, pelan ini turut mengambil kira tadbir urus yang diperkasa melalui pemanfaatan data raya, digitalisasi dan teknologi AI bagi memastikan penyampaian dasar lebih cekap, tepat dan adil.

Selain itu, pelan ini juga menangani isu yang berkaitan dengan pertindihan dan kurang penyelarasan antara agensi. Justeru, Pelan Tindakan Dasar Sosial Negara ini dijadikan panduan untuk memperkukuh koordinasi, mengoptimumkan sumber dan memastikan setiap intervensi lebih fokus serta berimpak tinggi kepada kumpulan sasar.

YB Dato' Sri Hajah Nancy Shukri, Menteri Pembangunan Wanita, Keluarga dan Masyarakat dalam ucapan aluannya berkata, "Sebagai peneraju, Kementerian Pembangunan Wanita, Keluarga dan Masyarakat akan terus memainkan peranan sebagai *caretaker* dalam menyelaraskan dan memantau pelaksanaan inisiatif di bawah Dasar Sosial Negara 2030. *However, as the saying goes, "it takes two to tango," close relationships and cooperation among all parties are essential to ensure that every planned effort can be implemented effectively*".

Menurutnya lagi, Pelan Tindakan DSN ini membawa pelbagai manfaat signifikan kepada rakyat, khususnya dalam memastikan pengagihan sumber dan perkhidmatan sosial seperti pendidikan, kesihatan dan kebajikan dapat dilaksanakan secara lebih adil, menyeluruh dan inklusif tanpa mengira latar belakang etnik, umur, lokasi mahupun status sosio-ekonomi. Beliau turut menyeru komitmen semua pihak untuk bersatu hati merealisasikan pelan tindakan ini untuk mengangkat darjat kesejahteraan sosial negara ke tahap yang lebih tinggi.

Turut hadir YB Datuk Seri Dr. Haji Dzulkefly Ahmad, Menteri Kesihatan, YB Datuk Ts. Mustapha @ Mohd Yunus bin Sakmud, Menteri di Jabatan Perdana Menteri (Sabah dan Sarawak), YB Puan Lim Hui Ying, Timbalan Menteri Pembangunan Wanita, Keluarga Dan Masyarakat, YBhg. Datuk Dr Maziah binti Che Yusoff, Ketua Setiausaha Kementerian Pembangunan Wanita, Keluarga dan Masyarakat; dan Pegawai-pegawai Kanan Jabatan dan Agensi Kementerian.

###

**UNIT KOMUNIKASI KORPORAT  
KEMENTERIAN PEMBANGUNAN WANITA, KELUARGA DAN MASYARAKAT  
7 MEI 2026**